

四庫全書

集部

欽定四庫全書

石倉歷代詩選卷五十六

明 曹學佺 編

中唐十

劉禹錫

字夢得
中山人

雜興學阮公體

朔風悲老驥
秋霜動鷺禽
出門有遠道
平野多層陰
滅沒馳絕塞
振迅拂華林
不因感衰節
安能激壯心

武夫詞

武夫何洸洸衣紫襲絳裳借問胡為爾列校在鷹揚依
倚將軍勢結交少年場探九害公吏袖办妬名倡家產
既不事顧盼自生光醉歌高樓上袒裼大道傍昔為編
戶人秉耒甘哺糠今來從軍樂躍馬飫膏粱猶思風塵
起無種取侯王

萋兮吟

天涯浮雲生爭蔽日月光窮巷秋風起先摧蘭蕙芳萬

貨列旗亭恣心注明璫名高毀所集言巧智難防多謂
行大道斯須成太行莫吟萋兮什徒使君子傷

經伏波神祠

蒙蒙篁竹下有路上壺頭漢壘磨鼃闔蠻溪霧雨愁懷
人敬遺像閱世指東流自負霸王略安知恩澤侯鄉園
辭石柱筋力盡炎州一以功名累翻思馬少游

登司馬錯故城

將軍將秦師西北莫遐服故壘清江上蒼煙晦喬木登

臨值蕭辰周覽壯前躅塹平陳葉滿墉高秋蔓綠廢井
抽寒菜毀臺生櫓穀耕人得古器宿雨多遺鏃楚塞鬱
重疊蠻溪紛詰曲留此數仞基幾人傷遠目

觀舞柘枝一首

胡服何葳蕤僊僊登綺墀神飈獵紅蕖龍燭然金枝垂
帶覆纖腰安鈿當嫵眉翹袖中繁鼓傾眸遡華棖燕秦
有舊曲淮南多冶詞欲見傾城處君看赴節時

步出武陵東亭臨江寓望

鷹至感風候霜餘變林麓孤颿帶日來寒江轉沙曲成
遙旗影動津晚櫓聲促月上彩霞收漁歌遠相續

為郎分司寄上都同舍

籍通金馬門身在銅駝陌省闈晝無塵宮樹遠凝碧荒
街深淺流古渡潺湲石惟有嵩丘雲堪誇蚤朝客

請告東歸發霸橋卻寄諸僚友

征途出霸涖回首傷如何故人雲雨散滿目山川多行
車無停軌流景同迅波前歡漸成昔感歎益悲歌

秋晚題湖城驛上池亭

秋次池上館林塘照南榮塵衣紛未解幽思浩已盈風
蓮墜故萼露菊含晚英恨為一夕客愁聽晨雞鳴

寄陝州姚中丞

八月天地肅二陵風雨收旌旗闕下來雲日關東秋禹
跡想前事漢臺餘故丘徘徊襟帶地左右帝王州留滯
悲昔老恩光榮徹侯相思望棠樹一寄商聲謳

團扇歌

團扇復團扇奉君清暑殿秋風入庭樹從此不相見上
有乘鸞女蒼蒼網蟲徧明年入懷袖別是機中練

宜城歌

野水遶空城行塵起孤驛荒臺側生樹石碣陽鐫額靡
靡度人行溫風吹宿麥

順陽歌

朝辭官軍驛前望順陽路野水入荒墳秋蟲鏤宮樹曾
聞天寶末胡馬西南驚城守魯將軍拔城從此去

莫徭歌

莫徭自生長名字無符籍市易雜鮫人婚姻通木客星
居占泉眼火種開山脊夜渡千仞谿含沙不能射

送春曲

春已暮冉冉如人老映葉見殘花連天是青草可憐桃
與李從此同桑棗

春景去此去何時回遊人千萬眼落日上高臺寂寞繁
花盡流鶯歸不來

百花行

長安百花時風景宜輕薄無人吝沽酒何處不張樂春
風連夜動微雨凌曉濯紅焰出墻頭雪光映樓角繁紫
韻松竹遠黃繞籬落臨路不勝愁輕飛一何託滿庭蕩
魂魄照簾成丹渥爛熳啖顛狂飄零勸行樂時節易晚
晚清陰覆池閣惟有安石榴當軒慰寂寞

別友人後得書因以詩贈

前時送君去揮手青門橋路轉不相見猶聞馬蕭蕭今

得出關書行塵日已遙春還遲君至共纈芳蘭茗

送元曉上人歸稽亭

重疊稽亭路山僧歸獨行遠峰斜日影本寺舊鐘聲徒
侶問新事煙雲合別情應誇乞食處蹋徧鳳凰城

虎丘寺路宴

青林虎丘寺林際翠微路立見山僧來遙從鳥飛處
峰淪寶玉千載惟丘墓埋劍人空傳鑿山龍已去捫蘿
披薜薈路轉夕陰遽虎嘯崖谷寒猿鳴松杉暮徘徊北

樓上江海窮一顧日映千里帆
鷗歸萬家樹斲因慙所
適果得捐外慮庭暗棲還雲
簷香滴甘露久迷空寂理
多為聲華故永欲投此山餘
生豈能誤

過柳州余登陸赴連州後五年余從故道比桂
嶺至前別處而君沒于南山中因賦詩以投
弔

憶昨與故人湘江岫頭別我馬映林嘶君
颿轉山滅馬嘶循故道颿滅如流電千里
江蘿春故人今不見

謝樂天聞新蟬見贈

碧樹鳴蟬後煙雲改容光
瑟然引秋氣芳草日夜黃
夾道喧古槐臨池思垂楊
離人下憶淚忠士激剛腸
昔聞阻山川今聽同匡牀
人情便所遇音韻豈殊常
因之比笙竽送我遊醉鄉

和樂天秋涼閒卧

暑退人體輕雨餘天色改
荷珠貫索斷竹粉殘妝在
高僧埽室請逸客登樓待
槐柳漸蕭疎閒門少光彩

和竇中丞晚入容江作

漢郡三十六鬱林東南遙人倫選清臣天外頒詔條桂
水步秋浪火山凌霧朝分圻辨風物入境聞謳謠莎岸
見長亭煙林隔麗譙日落舟益駛川平旗自飄珠浦遠
明滅金沙晴動搖一吟道中作離思懸層霄

春日寄楊八唐州

淮西春草長淮水逶迤光燕入新村路人耕舊戰場可
憐行春守立馬看斜桑

題淳于髡墓

生為齊贅壻死作楚先賢應以客卿葬故臨官路邊寓
言本多興放意能合權我有一石酒置君墳樹前

城西行

城西簇簇三叛族叛者為誰蔡吳蜀中使提刀出禁來
九衢車馬轟成雷臨刑與酒栝未覆仇家白官先請肉
守吏能然董卓膾飢烏來覘桓玄目城西人散秦街平
雨洗血痕春草綠

競渡曲

沅江五月平隄流，邑人相將浮綵舟。
靈均何年歌已矣，哀謠振楫從此起。
揚帆擊節雷闐闐，亂流齊進聲轟然。
蛟龍得雨鬣鬣動，蟠螭飲河形影聯。
刺史臨流塞翠幃，揭竿命爵分雄雌。
先鳴餘勇爭鼓舞，未至銜枚顏色沮。
百勝本自有前期，一飛由來無定所。
風俗如狂重此時，縱觀雲委江之湄。
綵旗夾岼照蛟室，羅襪凌波呈水嬉。
曲終人散空愁暮，招屈亭前水東注。

觀八陣圖

軒皇傳上畧蜀相運神機
水落魚蛇出沙平鷺鶴飛
波濤無動勢鱗介避餘威
會有知兵者臨流指是非

宿誠禪師山房題贈

宴坐白雲端清江直下看
來人望金刹講席繞香壇
虎嘯夜林動鼉鳴秋澗寒
衆音徒起滅心在靜中觀

秋日送客至潛水驛

候吏立沙際田家連竹溪
楓林社日鼓茅屋午時雞
雀

噪晚禾地蝶飛秋草畦驛樓宮樹近疲馬再三嘶

送趙中丞自司金外郎轉官參山南令狐僕射

幕府

綠樹滿褒斜西南蜀路賒驛門臨白杜縣道過黃花相
府開油幕門生逐絳紗行看布政後還從入京華

送河南皇甫少尹赴絳州

祖帳臨周道前旌指晉城午橋羣吏散亥字老人迎詩
酒同行樂分離始見情從茲洛陽社吟詠欠書生

送盧處士歸嵩山別業

世業嵩山隱雲深無四隣
藥爐燒姹女酒甕貯賢人
曉日華陰霧秋風函谷塵
送君從此去鈴閣少談賓

同樂天和微之深春

何處深春好春深萬乘家
宮門皆映柳輦路盡穿花
池色連天漢城形象帝車
旌旗暖風裏獵獵向西斜

新秋對月寄樂天

月露發光彩此時方見秋
夜涼金氣應天靜火星流
蛩

響偏依井螢飛直過樓相知盡白首清景復追遊

松江送處州奚使君

吳越古今路滄波朝夕流從來別離地能使管絃愁江
草帶煙暮海雲含雨秋知君五陵客不羨石門遊

題招隱寺

隱士遺塵在高僧精舍開地形臨渚斷江勢觸山迴楚
野花多思南禽聲例哀殷勤最高頂閉却望鄉來

思歸寄山中友人

蕭條對秋色相憶在雲泉木落病身死潮平歸思懸涼
鐘山頂寺暝火渡頭船此地非吾土淹留又一年

寶朗州見示與澧州元郎中早秋贈答命同作
隣境諸侯同舍郎芷江蘭浦限無梁秋風門外旌旗動
曉露庭中橘柚香玉簾微涼宜白晝金茄入暮應清商
騷人昨夜聞鷓鴣不歎流年惜衆芳

衢州徐員外使君遺以縞紵魚竹書箱因成一
篇用答佳貺

爛柯山下舊仙郎
列宿來添婺女光
遠放歌聲分白紵
知傳家學與青箱
水朝滄海何時去
蘭在幽林亦自芳
聞道天台有遺愛
人將琪樹比甘棠

松滋渡望峽中

渡頭輕雨灑寒梅
雲際溶溶雪水來
夢渚草長迷楚望
夷陵土黑有秦灰
巴人淚應猿聲落
蜀客船從鳥道回
十二碧峰何處所
永安宮外是荒臺

秋日題寶員外崇德里新居

長愛街西風景閒到君居處暫開顏清光門外一渠水
秋色墻頭數點山踈種碧桃通月朗多栽紅藥待春還
莫言堆案無餘地認得詩人在此間

尉遲郎中見示自南遷牽復却至洛城東舊居
之作因以和之

曾遭飛語十年謫新受恩光萬里還朝服不妨遊洛浦
郊園依舊看嵩山竹含天籟清商樂水遶庭臺碧玉環
留作功成身退地如今只是暫時閒

酬朗州崔員外與任十四兄侍御同過鄙人舊
居見懷之什時守吳郡

昔日居隣招屈亭
楓林橘樹鷓鴣聲
一辭御苑青門去
十見蠻江白芷生
自此曾沾宣室召
如今還守闔閭城
何人萬里能相憶
同舍仙郎與外兄

赴蘄州李郎中赴任

楚關蘄水路非賒
東望雲山日夕嘉
薤葉照人呈夏簟
松花滿盞試新茶
樓中飲興因明月
江上詩情為晚霞

北地交親長引領蚤將玄鬢到京華

酬寶員外郡齋宴客偶命柘枝因見奇伎兼呈

張十一院長元九侍郎

分憂餘刃又從公白羽胡牀嘯詠中綵筆臨戎矜倚馬
華堂留客看驚鴻渚宮油幕方高步澧浦甘棠有幾叢
若問騷人何處所門門寒水落江楓

謝寶員外旬林早涼見示詩

新秋十日澣朱衣鈴閣無聲公吏歸風韻漸高梧葉動

露光初重槿花稀四時冉冉催容鬢三爵醺醺忘是非
更報明朝池上酌人知太守字玄暉

酬浙東李侍郎越州春晚即事長句

越中霽靄繁華地秦望峰前禹穴西湖草初生邊雁去
山花半謝杜鵑啼青油畫卷臨高閣紅旆晴翻繞古堤
明日漢庭徵舊德老人爭出若耶溪

再授連州至衡陽酬柳柳州贈別

去國十年同赴召渡江千里又分岐重臨事異黃丞相

三黜名慙柳士師歸目併隨回雁盡愁腸正遇斷猿時
桂江東過連山下相望長吟有所思

懷妓

玉釵重合兩無緣魚在深潭鶴在天得意紫鸞休舞鏡
能言青鳥罷銜牋金盆已覆難收水玉枕長拖不續絃
若向蘿蕪山下過遙將紅淚灑窮泉

巫山女神廟

巫山十二鬱蒼蒼片石亭亭號女郎曉霧乍開疑卷幔

山花欲謝似殘妝
星河好夜聞清佩
雲雨歸時帶異香
何事神仙九天上
人間來就楚襄王

柳絮

飄颻南陌起東隣
漠漠濛濛好度春
花巷暖隨輕舞蝶
玉樓晴拂艷妝人
縈迴謝女題詩筆
點綴陶公漉酒巾
何處好風偏似雪
隋河隄上古江津

送曹處士歸越中舊隱詩

行盡瀟湘萬里餘
少逢知己憶吾廬
數間茅屋閒臨水

一盞秋燈夜讀書地遠何當隨計吏榮成終自詣公車
剡中若問連州事惟有千山畫不如

自江陵沿流道中

三千三百西江水自古如今要路津月夜歌謠有漁父
風天氣色屬商人沙村好處多逢寺山葉紅時覺勝春
行到南朝征戰地古來名將盡為神

魚復江中

扁舟盡室貧相逐白髮藏冠鑷更加遠水自澄終日綠

晴林長落過春花客情浩蕩逢鄉語詩意留連重物華
風檣好住貪程去斜日青帘背酒家

酬竇員外使君寒食日途次松滋渡先寄示四

韻

楚鄉寒食橘花時野渡臨風駐綵旗草色連雲人去住
水紋如縠燕差池朱輪尚憶羣飛雉青綬初懸左顧龜
非是湓城白司馬水曹何事與新詩

樂天少傅五月長齋廣延緇徒謝絕文友坐成

睽間因以戲之

五月長齋戒深居絕送迎不離通德里便是法王城舉
目皆僧事全家少俗情精脩無上道結念未來生賓閣
緇衣占書堂信鼓鳴戲童為塔像啼鳥學經聲暗網籠
歌扇流塵暗酒鐺不知何處道作佛幾時成

和楊侍郎初至彬州記事書情題郡齋八韻

旌節下朝臺分圭從北回城頭鶴立處驛樹鳳棲來舊
路芳塵在新恩驛騎催里閭風偃草鼓舞忭成雷吏散

山禽轉庭香夏藥開郡齋堪四望壁記有三台人訝徵
黃晚文非弔屈哀一吟梁父曲知是卧龍才

題壽安甘霖館

公館似仙家池清竹逕斜山禽忽驚起衝落半巖花

紀南歌

風煙紀南城塵土荆門路天寒多獵騎走上樊姬墓

秋風引

何處秋風至蕭蕭送雁羣朝來入庭樹孤客最先聞

館娃宮在舊郡西南硯石山上瞰姑蘇臺傍有
米香逕梁天監中置佛寺曰靈嵒即故宮也
信為絕境因賦一章

月殿移椒壁天花代舜華惟餘米香徑一帶入山斜
罷和州遊達康

秋水清無力寒山暮多思官閒不計程徧上南朝寺
元和甲午歲詔書盡徵江湘逐客余自武陵赴
京宿于都亭有懷續來諸君子

雲雨江湘起困龍
武陵樵客躡仙蹤
十年楚水楓林下
今夜初聞長樂鐘

石頭城

山圍故國周遭在
潮打空城寂寞回
淮水東邊舊時月
夜深還過女牆來

臺城

臺城六代競豪華
結綺臨春事最奢
萬戶千門成野草
祇緣一曲後庭花

生公講堂

生公說法鬼神聽
身後空堂夜不扃
高坐寂寥塵漠漠
一方明月可中庭

江令宅

南朝詞臣北朝客
歸來惟見秦淮碧
池臺竹樹三畝餘
至今人道江家宅

聽舊宮中樂人穆氏唱歌

曾隨織女渡天河
記得雲間第一歌
休唱貞元供奉曲

當時朝士已無多

與歌者何戡

二十餘年別帝京
重聞天樂不勝情
舊人惟有何戡在
更與殷勤唱渭城

隄上行二首

酒旗相望大隄頭
隄下連檣隄上樓
日暮行人爭渡急
槳聲幽輒滿東流

江南江北望煙波
入夜行人相踏歌
桃葉傳情竹枝怨

水流無限月明多

躡歌詞二首

桃蹊柳陌好經過
燈下妝成月下歌
為是襄王故宮地
至今猶自細腰多

新詞宛轉遞相傳
振袖傾鬟風露前
月落烏啼雲雨散
遊童陌上拾花鈿

阿嬌怨

望見歲凝舉翠華
試開金屋掃庭花
須臾宮女傳來信

言幸平陽公主家

楊柳枝詞

煬帝行宮汴水濱
數株殘柳不勝春
晚來風起花如雪
飛入宮牆不見人

洛中春末送杜錄事赴蘄州

開樽花下長相見
明日忽為千里人
君過午橋回首望
洛城猶自有殘春

和樂天春詞

新妝宜面下朱樓
深鎖春光一院愁
行到中庭數花朵
蜻蜓飛上玉搔頭

酬馬大夫登涯口戍見寄

新辭金印拂朝纓
臨水登山四體輕
猶念天涯未歸客
瘴雲深處守孤城

石倉歷代詩選卷五十六

欽定四庫全書

石倉歷代詩選卷五十七

明 曹學佺 編

中唐十一

柳宗元

字子厚
河東人

法華寺石門精舍

拘情病幽鬱曠志寄高爽願言懷名緇東峰旦夕仰始
欣雲雨霽尤悅草木長道同有愛弟披拂恣心賞松溪

竄窳入石棧黃緣上蘿葛繇層覺莓苔侵標榜密林互
對聳絕壁儼雙敞塹峭出蒙龍墟嶮臨湜瀆稍疑地脉
斷悠若天梯往結構罩羣岨迴環驅萬象小劫不逾瞬
大千若在掌體空得化元觀有遺細想喧煩困蠓蠓跼
蹐疲颺颺寸進諒何營尋直非所枉探奇極遙矚窮妙
閱清響理會方在今神開庶殊曩茲游苟不嗣浩氣竟
誰養道異誠所希名賓匪余仗超摠藉外褒俛默有內
朗鑑爾揖古風終焉乃吾黨潛軀委韁鎖高步謝塵埃

蓄志徒為勞追蹤將焉倣淹留值頽暮眷戀睇遐壤映
日雁連軒翻雲波決泝殊風紛已萃鄉路悠且廣羈木
畏漂浮離旌倦搖蕩昔人歎違志出處今已兩何用期
所歸浮圖有遺像幽蹊不盈尺虛室自函丈微言信可
傳申旦稽吾顙

遊朝陽巖遂登西亭

謫棄殊隱淪登涉非遠郊所懷緩伊鬱詎欲肩夷巢高
巖瞰清江幽壑潛神蛟開曠延陽景迴薄攢林梢西亭

構其巔反宇臨呀摩背瞻星辰興下見雲雨交惜非吾
鄉土得以蔭菁茅羈貫去江介世仕尚函嶠故墅即澧
川數畝均肥磽臺館葺荒丘池塘䟽沈均會有圭組戀
遂貼山林嘲薄軀信無庸瑣屑劇斗筭囚居固其宜厚
羞久已包庭除植蓬艾隙牖懸蠨蛸所賴山水客扁舟
枉長梢挹流觴清觴掇野代嘉肴適道有高言取樂非
絃匏逍遙屏幽昧澹泊辭喧呶晨雞不余欺風雨聞嘒
嘒再期永日閒提挈移中庖

湘口館瀟湘二水所會

九疑濬傾奔臨源委縈迴會合屬空曠泓澄停風雷高
館軒霞表危樓臨山隈茲辰始漱霽纖雲盡褰開天秋
日正中水碧無塵埃杳杳漁父吟呌呌羈鴻哀境勝豈
不豫慮分固難裁升高欲自舒彌使遠念來歸流駛且
廣汎舟絕沿洄

南澗中題

秋氣集南澗獨遊亭午時迴風一蕭瑟林影久參差始

至若有得稍深遂忘疲羈禽響幽谷寒藻舞淪漪去國
魂已遠懷人淚空垂孤生易為感失路少所宜索寞竟
何事徘徊祇自知誰為後來者當與此心期

遊石角過小嶺至長烏村

志適不期貴道存豈偷生久忘上封事復笑昇天行竄
逐宦湘浦搖心劇懸旌始驚陷世議終欲逃天刑歲月
殺憂慄慵踈寡將迎追遊疑所愛且復舒吾情石角恣
幽步長鳥遂遐征磴迴茂樹斷景宴寒川明曠望少行

人時聞田鶴鳴風簟冒水遠霜稻侵山平稍與人事間
益知身世輕為農信可樂居寵真虛榮喬木餘故國願
言果丹誠四支反田畝釋志東臯耕

構法華寺西亭

竄身楚南極山水窮險艱步登最高寺蕭散任踈頑西
垂下斗絕欲似窺人寰反如在幽谷榛翳不可攀命童
恣披剪葺宇橫斷山割如判清濁飄若昇雲間遠岫攢
衆頂澄江抱清灣夕照臨軒墜栖鳥當我還

覺衰

久知老會至不謂便見侵今年宜未衰稍已來相尋齒
踈髮就種奔走力不任咄此可奈何未必傷我心但願
得美酒朋友常共斟是時春向暮桃李生繁陰日照天
正綠杳杳歸鴻吟出門呼所親扶杖登西林高歌足自
快商頌有遺音

旦攜謝山人至愚池

新沐換輕幘曉池風露清自詣塵外意况與幽人行霞

散衆山迴天高數雁鳴機心付當路聊適義皇情

首春逢耕者

南楚春候早餘寒已滋榮土膏釋原野百蟄競所營綴
景未及郊穡人先偶耕園林幽鳥囀渚澤新泉清農事
誠素務羈囚阻平生故池想蕪沒遺畝當榛荆慕隱既
有繫圖功遂無成聊從田父言款曲陳此情眷然撫耒
耜迴首煙雲橫

溪居

久為簪組累幸此南夷謫閒依農圃隣偶似山林客曉
耕翻露草夜榜響溪石來往不逢人長歌楚天碧

初夏雨後尋愚溪

悠悠雨初霽獨繞清溪曲引杖試荒泉解帶圍新竹沈
吟亦何事寂寞固所欲幸此息營營嘯歌靜炎燠

韋使君黃溪祈雨見召從行至祠下口號

驕陽愆歲事良牧念苗畝列騎低殘月鳴笳度碧虛稍
窮樵客路遙駐野人居谷口寒流淨叢祠古木踈焚香

秋霧濕奠玉曉光初
肸蠁巫言報精誠
禮物餘惠風仍
偃草靈雨會隨車
俟罪非真吏翻慚
奉簡書

秋曉行南谷經荒村

杪秋霜露重晨起行
幽谷黃葉覆溪橋
荒村惟古木寒
花踈寂寞幽泉微
斷續機心久已忘
何事驚麋鹿

中夜起望西園值月上

覺聞寒露墜開戶
臨西園寒月上東
嶺泠泠踈竹根石
泉遠逾響山鳥時
一喧倚楹遂至旦
寂寞將何言

零陵春望

平野春草綠
曉鶯啼遠林
日晴瀟湘渚
雲斷岫嶺岑
仙駕不可望
世途非所任
凝情空景慕
萬里蒼梧陰

法華寺西亭夜飲

祇樹夕陽亭
共傾三昧酒
霧暗水連階
月明花覆牖
莫厭樽前醉
相看未白首

戲題階前芍藥

凡卉與時謝
妍華麗茲晨
歌紅醉濃露
窈窕留餘春
孤

賞白日暮暄風動搖頻夜窓藹芳氣幽卧知相親願致
溱洧贈悠悠南國人

湘岸移木芙蓉植龍興精舍

有美不自蔽安能守孤根盈盈湘西岸秋至風露繁麗
影別寒水穠芳委前軒芰荷諒難雜反此生高原

早梅

早梅發高樹迴映楚天碧朔吹飄夜香繁霜滋曉日欲
為萬里贈杳杳山水隔寒英坐銷落何用慰遠客

南中榮橘柚

橘柚懷貞質受命此炎方
密林耀朱綠晚歲有餘芳
殊風限清漢飛雪滯故鄉
攀條何所歎北望熊與湘

芙蓉亭

新亭俯朱檻嘉木開芙蓉
清香晨風遠溽采寒露濃
瀟灑出人世低昂多異容
嘗聞色空喻造物誰為工
留連秋月晏迢遞來山鐘

苦竹橋

危橋屬幽徑繚繞穿疎林迸篠分苦節輕筠抱虛心俯
瞰涓涓流仰聆蕭蕭吟差池下煙日嘲哢鳴山禽諒無
要津用栖息有餘陰

田家三首

蓐食狗所務驅牛向東阡雞鳴村巷白夜色歸暮田札
札耒耜聲飛飛來烏鵲竭茲筋力事持用窮歲年盡輸
助徭役聊就空自眠子孫日已長世世還復然

籬落隔煙火農談四隣夕庭際秋蟲鳴疎麻方寂歷蠶

絲盡輸稅機杼空倚壁里胥夜經過雞黍事筵席各言
官長峻文字多督責東鄉後租期車轂陷泥澤公門少
推恕鞭扑恣狼藉努力慎經營肌膚真可惜迎新在此
歲惟恐踵前跡

古道饒蒺藜縈迴古城曲蓼花被隄岸陂水寒更綠是
時收穫竟落日多樵牧風高榆柳疎霜重梨棗熟行人
迷去住野鳥競栖宿田家笑相念昏黑慎原陸今年幸
小豐無厭餽與粥

酬婁秀才寓居開元寺早秋月夜病中見寄

客有故園思，蕭湘生夜愁。
病依居士室，夢繞羽人丘。
味道憐知止，遺名得自求。
壁空殘月曙，門掩候蟲秋。
謬委雙金重，難徵雜佩酬。
碧霄無枉路，徒此助離憂。

初秋夜坐贈吳武陵

稍稍雨侵竹，翻翻鶻驚叢。
美人隔湘浦，一夕生秋風。
積霧杳難極，滄波浩無窮。
相思豈云遠，即席莫與同。
若人抱奇音，朱絃絙枯桐。
清商激西颿，汎艷凌長空。
自得本

金剛經
卷五十七
無作天成諒非功希聲悶大樸聾俗何由聰

晨詩超師院讀禪經

汲井漱寒齒清心拂塵服閒持貝葉書步出東齋讀真
源了無取妄跡世所逐遺言異可冥繕性何由熟道人
庭宇靜苔色連深竹日出霧露餘青松如膏沐澹然離
言說悟悅心自足

贈江華長老

老僧道機熟語默心皆寂去歲別春陵沿流此投跡室

空無侍者巾屨惟挂壁一飯不願餘跣趺便終夕風牕
疎竹響露井寒松滴偶地即安居滿庭芳草積

零陵贈李卿元侍御簡吳武陵

理世固輕士棄捐湘之湄陽光竟四溟敲石安所施鍛
羽集枯榦低昂互鳴悲朔雲吐風寒寂歷窮秋時君子
尚容與小人守兢危慘悽日相視離憂坐自滋樽酒聊
可酌放歌諒徒為惜無協律者窈眇絃吾詩

界圍巖水簾

金匱山志卷五十七
界圍滙湘曲青壁環澄流懸泉聚成簾羅注無時休韻
磬叩凝碧鏘鏘徹巖幽丹霞冠其巔想像凌虛游靈境
不可狀鬼工諒難求楚臣昔南逐有意仍丹丘今我姑
北旋新詔釋縲囚采真誠眷戀許國無淹留再來寄幽
夢遺貯催行舟

再至界圍巖水簾遂宿巖下

發春念長違中夏欣再覩是時值物秀杳若臨玄圃歎
陽訝垂冰白日驚雷雨笙簧潭際起鶴鶴雲間舞古昔

凝青枝陰草濕翠羽蔽空素彩列激浪寒光聚的皪沈
珠淵鏘鳴捐佩浦幽巖盡屏倚新月玉鈎吐夜涼星滿
川忽疑眠洞府

寄韋珩

初拜柳州出東郊道旁相送皆賢豪迴眸炫晃別羣玉
獨赴異域穿蓬蒿炎煙六月咽口鼻胃鳴肩舉不可逃
桂州西南又千里灘水鬪石麻蘭高陰森野葛交蔽日
懸蛇結虺如蒲萄到官數宿賊滿野縛壯殺老啼且號

朝行夜坐設方畧籠銅枹鼓手所操奇瘡釘骨狀如箭
鬼手脫命爭纖毫今年噬毒得霍疾支心攪腹戟與刀
邇來氣少筋骨露蒼白潄汨盈顛毛君今矻矻又竄逐
辭賦已復窮詩騷神兵妙畧頻破虜四溟不日清風濤
聖恩倘忽念行葦十年踐踏久已勞幸因解網入鳥獸
畢命江海終遊遨願言未果身益老起望東北心滔滔

聞黃鸝

倦聞子規朝暮聲不意忽有黃鸝鳴一聲夢斷楚江曲

滿眼故園春意生目極千里無山河麥茫際天搖青波
王畿優本少賦役務閒酒熟饒經過此時晴煙最深處
舍南巷北遙相語翻日迴度昆明飛凌風邪看細柳翦
我今誤落千萬山身同傖人不思還鄉禽何事亦來此
令我生心憶桑梓聞聲迴翅歸務速西林紫樵行當熟

楊白花

楊白花風吹渡江水坐令宮樹無顏色搖蕩春風千萬
里茫茫曉日下長秋哀歌未斷城鷄起

漁翁

漁翁夜傍西巖宿
曉汲清湘然楚竹
煙銷日出不見人
欸乃一聲山水綠
迴看天際下中流
巖上無心雲相逐

梅雨

梅實迎時雨
蒼茫值晚春
愁深楚猿夜
夢斷越雞晨
海霧連南極
江雲暗北津
素衣今盡化
非為帝京塵

北還登漢陽北原題臨川驛

驅車方向闕
回首一臨川
多壘非余恥
無謀終自憐
亂

松知野寺餘雪記山田惆悵樵漁事今還又落然

酬徐二中丞普寧郡內池館即事見寄

鴈鴻念舊行虛館對芳塘落日明朱檻繁花照羽觴泉
歸滄海近樹入楚山長榮賤俱為累相期在故鄉

奉和周二十二丈酬彬州侍郎衡江夜泊得韶
州書并附當州生黃茶一封率然成篇代意
之作

丘山仰德耀天路下征騑夢喜三刀近書嫌五載違凝

情江月落屬思嶺雲飛會入司徒府還邀周掾歸

衡陽與夢得分路贈別

十年顛顚到秦京誰料翻為嶺外行伏波故道風煙在
翁仲遺墟草樹平直以慵疎招物議休將文字占時名
今朝不用臨河別垂淚千行便濯纓

登柳州城樓寄漳汀封連四州

城上高樓接大荒海天愁思正茫茫驚風亂颭芙蓉水
密雨斜侵薜荔牆嶺樹重遮千里月江流曲似九迴腸

共來百越文身地猶自音書滯一鄉

柳州寄丈人周韶州

越絕孤城千萬峰空齋不語坐高舂
印文生綠經旬合硯匣留塵盡日封
梅嶺寒烟藏翡翠桂江秋水露鰓鱗
丈人本自忘機事為想年來憔悴容

得盧衡州書因以詩寄

臨蒸且莫歎炎方為報秋來雁幾行
林邑東迴山似戟牂牁南下水如湯
蒹葭淅瀝含秋霧橘柚玲瓏透夕陽

非是白蘋洲畔客還將遠意問瀟湘

別舍弟宗一

零落殘魂倍黯然雙垂別淚越江邊
一身去國六千里萬死投荒十二年
桂嶺瘴來雲似墨洞庭春盡水如天
欲知此後相思夢長在荊門郢樹烟

春懷故國

九扈鳴已晚楚鄉農事春悠悠故池水空待灌園人

零陵早春

問春從此去幾日到秦原憑寄還鄉夢殷勤入故園

江雪

千山鳥飛絕萬逕人蹤滅孤舟蓑笠翁獨釣寒江雪

入黃溪聞猿

溪路千重曲寒猿何處鳴逐臣淚已盡虛作斷腸聲

長沙驛前南樓感舊

海鶴一為別存亡三十秋今來數成淚獨上驛南樓

夏晝偶作

南州溽暑醉如酒
隱几熟眠開北牖
日午獨覺無餘聲
山童隔竹敲茶臼

銅魚使赴都寄親友

行盡關山萬里餘
到時閭井是荒墟
附庸惟有銅魚使
此後無因寄遠書

種木榦花

上苑年年占物華
飄零今日在天涯
祇應長作龍城守
剩種庭前木榦花

柳州二月榕葉落盡偶題

宦情羈思共悽悽
春半如秋意轉迷
山城過雨百花盡
榕葉滿庭鶯亂啼

與浩初上人同省山寄京華親友

海畔尖山似劒鋌
秋來處處割人腸
若為化得身千億
散作峰頭望故鄉

過衡州見新花開却寄弟

故國名園久別離
今朝楚樹發南枝
晴天歸路好相逐

正是峰前迴雁時

韓愈

字退之
南陽人

猗蘭操孔子傷不逢時作

蘭之猗猗揚揚其香不采而佩于蘭何傷今天之旋其
昌為然我行四方以日以年雪霜貿貿薺麥之茂子如
不傷我不爾覲薺麥之茂薺麥之有君子之傷君子之
守

岐山操周公為太王作

我家于幽自我先公伊我承序敢有不同今狄之人將
土吾疆民為我戰誰使死傷彼岐有岨我往獨處爾莫
余追無思我悲

秋懷

窓前兩好樹衆葉光蕤蕤秋風一披拂策策鳴不已微
燈照空牀夜半偏入耳愁憂無端來感歎成坐起天明
視顏色與故不相似羲和驅日月疾急不可恃浮生雖
多途趨死惟一軌胡為浪自苦得酒且歡喜

其二

秋氣日惻惻秋空日凌凌上無枝上蜩下無盤中蠅豈
不感時節耳目去所憎清曉卷書坐南山見高稜其下
澄湫水有蛟寒可冒惜哉不得往豈謂吾無能

其三

離離掛空悲感感抱虛警露泣秋樹高蟲弔寒夜永斂
退就新懦趨營悼前猛歸愚識夷塗汲古得脩綆名浮
猶有耻味薄真自幸庶幾遺悔尤即此是幽屏

其四

秋夜不可晨
秋日苦易暗
我無汲汲志
何以有此憾
寒雞空在栖
缺月煩屢瞰
有琴具徽絃
再鼓聽愈澹
古聲久埋滅
無由見真濫
低心逐時趨
苦勉祇能暫
有如乘風船
一縱不可攬
不如覩文字
丹鉛事點勘
豈必求羸餘
所要石與甌

贈孟郊

長安交游者
貧富各有徒
親朋相過時
亦合取相娛
陋

室有文史高門有笙箏何能辨榮悴且欲分賢愚

落葉一首送陳羽

落葉不更息斷蓬無復歸飄飄終自異邂逅暫相依
悄深夜語悠悠寒月輝誰云少年別流淚各霑衣

同冠峽

南方二月半春物亦已少維舟山水間晨聽聽百鳥宿
雲尚含姿朝日忽升曉羈旅感和鳴囚拘念輕矯潺潺
淚久迸詰曲思增統

合江亭

紅亭枕湘江蒸水會其左瞰臨眇空闊綠淨不可唾維
昔經營初邦君實王佐翦林遷神祠買地費家貨梁棟
宏可愛結構麗匪過伊人去軒騰茲宇遂顏挫老郎來
何暮高唱久乃和樹蘭盈九畹栽竹逾萬个長綆汲滄
浪幽蹊下坎坷波濤夜俯聽雲樹朝對卧初如遺宦情
終乃最郡課人生誠無幾事往悲豈那

陪杜侍御遊湘西兩寺獨宿有題

長沙千里平勝地猶在險況當江闊處斗起勢匪漸深
林高玲瓏青山上琬琰路窮臺殿闕佛事煥且儼剖竹
走源泉開廊架崖厂是時秋之殘暑氣尚未斂羣行忘
後先困息棄拘檢客堂喜空涼華榻有清簟澗蔬蕒蒿
芹水果剥菱芡伊余夙所慕陪賞亦云忝幸逢車馬歸
獨宿門不掩山樓黑無月漁火燦星點夜風一何喧杉
檣屢磨颭猶疑在波濤怵惕夢成魘靜思屈原沈遠憶
賈誼貶椒蘭爭妬忌絳灌共讒諂誰令悲生腸坐使淚

盈臉翻飛之羽翼指摘困瑕玷珥貂藩維重政化類分
陝禮賢道何優奉已事苦儉大厦棟方隆巨川櫟行剡
經營誠少暇游晏固已歎旅程愧淹留徂歲嗟荏苒平
生每多感柔翰遇頻染展轉嶺猿鳴曙燈青暎暎

烽火

登高望烽火誰謂塞塵飛王城富且樂曷不事光輝勿
言日已暮相見恐行稀願君熟念此秉燭夜中歸我歌
寧自感乃獨淚霑衣

縣齋讀書

出宰山水縣讀書松桂林蕭條捐末事邂逅得初心哀
狄醒俗耳清泉潔塵襟詩成有共賦酒熟無孤斟青竹
時默釣白雲日幽尋南方本多毒北客恒懼侵謫譴甘
自守滯留愧難任投章類縞帶佇答逾魚金

新竹

筍添南階竹日日成清悶縹節已儲霜黃苞猶掩翠出
欄抽五六當戶羅三四高標凌秋嚴貞色奪春媚稀生

巧補林併出疑爭地縱橫乍依行爛漫忽無次風枝未
飄吹露粉先涵淚何人可攜翫清景空瞪視

從仕

居閒食不足從仕力難任兩者皆害性一生恒苦心黃
昏歸私室惆悵起歎音棄置人間世古來非獨今

過南陽

南陽郭門外桑下麥青青行子去未已春鳩鳴不停秦
商邈既遠湖海浩將經孰忍生以感吾其寄餘齡

早赴街西行香贈盧李二中舍人

天街東西異祇命遂成遊月明御溝水蟬吟堤樹秋老
僧情不薄僻寺境還幽寂寥二三子歸騎得相收

天星送楊凝郎中賀正

天星牢落雞喔咿僕夫起餐車載脂正當窮冬寒未已
借問君子行安之會朝元正無不至受命上宰須及期
侍從近臣有虛位公今此去歸何時

鳴雁

嗷嗷鳴雁鳴且飛窮秋南去春北歸去寒就暖識所依
天長地闊棲息稀風霜重苦稻粱微毛羽催落身不肥
徘徊反顧羣侶違哀鳴欲下洲渚非江南水闊朝雲多
草長沙軟無網羅閒飛靜集鳴相和違憂懷惠性匪他
凌風一舉君謂何

岫嶠山

岫嶠山尖神禹碑字青石赤形模竒科斗拳身薤倒披
鸞飄鳳泊拏虎螭事嚴跡秘鬼莫窺道人獨上偶見之

我來咨嗟涕漣漣千搜萬索何處有森森綠樹猿猱啼
杏花

居鄰北郭古寺空杏花兩株能白紅曲江滿園不可到
看此寧避雨與風二年流竄出嶺外所見草木多異同
冬寒不暖地恒泄陽氣發亂無全功浮花浪蘂鎮長有
纔開還落瘴霧中山榴躑躅少意思照耀黃紫徒為叢
鷓鴣鉤輅猿叫歇杳靄深谷攢青楓豈如此樹一來翫
若在京國情何窮今旦胡為忽惆悵萬片飄泊隨西東

明年花發應更好道人莫忘隣家翁

感春

洛陽東風幾時來川波岸柳春全迴宮門一鎖不復啟
雖有九陌無塵埃策馬上橋朝日出樓閣赤白正崔嵬
孤吟屢闕莫與和寸恨至短誰能裁

酬司門盧世兄雲夫院長望秋作

長安雨洗新秋出極目寒鏡開塵函終南曉望蹋龍尾
倚天更覺青巉巖自知短淺無所補從事久此守朝衫

歸來得便即遊覽
暫似壯馬脫重銜
曲江荷花蓋十里
江湖生長思莫緘
樂遊下矚無遠近
綠槐萍合不可芟
白首寓居誰借問
平地寸步局雲巖
雲夫吾兄有狂氣
嗜好與俗殊酸鹹
日來省我不肯去
論詩說賦相喃喃
望秋一章已驚絕
猶言低抑避謗讒
若使乘酣騁雄怪
造化何以當鑄鐔
嗟我小生值強伴
怯膽變勇神明鑒
馳坑跨谷終未悔
為利而止真貪殘
高揖羣公謝名譽
遠追甫白感至誠
樓頭完月不共宿
其奈就缺行攔攔

木芙蓉

新開寒露叢遠比水間紅豔色寧相妬嘉名偶自同
米江官渡晚寒木古祠空願得勤來看無令便逐風

送李員外院長分司東都

去年秋露下羈旅逐東征今歲春光動驅馳別上京
飲中相顧色送後獨歸情兩地無千里因風數寄聲

自袁州還京行次安陸先寄隨州周員外

行行指漢東暫喜言笑同雨雪離江上蒹葭出夢中
面

猶含瘴色眼已見華風歲暮難相值酣歌未可終

送桂州嚴大夫

蒼蒼森八桂茲地在湘南江作青羅帶山如碧玉簪戶
多輸翠羽家自種黃甘遠勝登仙去飛鸞不假驂

左遷至藍關示姪孫湘

一封朝奏九重天夕貶潮州路八千欲為聖明除敝事
肯將衰朽惜殘年雲橫秦嶺家何在雪擁藍關馬不前
知汝遠來應有意好收吾骨瘴江邊

量移袁州張韶州端公以詩相賀因酬之

明時遠逐事何如遇赦移官罪未除北望詎令隨塞雁
南遷纔免葬江魚將經貴郡煩留客先惠高文謝起余
暫欲繫船韶石下上賓虞舜整冠裾

花島

蜂蝶去紛紛香風隔岸聞欲知花島處水上覓紅雲

月池

寒池月下明新月池邊曲若不妬清妍却成相映燭

次硤石

數日方離雪今朝又出山試憑高處望隱約見潼關

題楚昭王廟

丘墳滿目衣冠盡城闕連雲草樹荒猶有國人懷舊德
一間茅屋祭昭王

湘中酬張十一功曹

休垂絕徼千行淚共汎清湘一葉舟今日嶺猿兼越鳥
可憐同聽不知愁

湘中

猿愁魚踊水翻波自古流傳是汨羅
蘋藻滿盤無處奠
空聞漁父扣舷歌

榴花

五月榴花照眼明枝間時見子初成
可憐此地無車馬
顛倒青苔落絳英

春雪

新年都未有芳華二月初驚見草芽
白雪却嫌春色晚

故穿庭樹作飛花

題于賓客莊

榆莢車前蓋地皮
薔薇蘸水筍穿籬
馬蹄無入朱門跡
縱使春歸可得知

晚春

草樹知春不久歸
百般紅紫鬪芳菲
楊花榆莢無才思
惟解漫天作雪飛

落花

已分將身著地飛
那羞踐蹋損光輝
無端又被春風誤
吹落西家不得歸

早春

天街小雨潤如酥
草色遙看近却無
最是今年春好處
絕勝煙柳滿皇都

石倉歷代詩選卷五十七

欽定四庫全書

石倉歷代詩選卷五十八

明 曹學佺 編

中唐十二

孟郊

字東野
湖州人

送青陽上人遊越

秋風吹白髮微宦自蕭索江僧何用歎溪縣饒寂寞楚
思物皆清越山勝非薄時看鏡中月獨向衣上落多謝

入冥鴻笑余在籠鶴

聞砧

杜鵑聲不哀斷猿啼不切月下誰家砧一聲腸一絕杵聲不為客客聞髮自白杵聲不為衣欲令遊子歸

離思

不寐亦不語片月秋梢舉孤鴻憶霜羣獨鶴叫雲侶怨彼浮花心飄飄無定所高張繫綵帆遠過梅根渚迴織別離字機聲亦酸楚

秋懷九首

孤骨夜難卧吟蟲相唧唧老泣無涕洟秋露為滴瀝去
壯暫如剪來哀紛似織觸緒無新心叢悲有餘憶詎忍
逐南帆江山踐往昔

秋月顏色冰老客志氣單冷露滴夢破峭風梳骨寒席
上印病文腸中轉愁盤疑懷無所憑虛聽多無端梧桐
枯崢嶸聲響如哀彈

秋至老更貧破屋無門扉一片月落牀四壁風入衣踈

夢不復遠弱心良易歸商葩將老綠繚繞爭餘輝野步
賤事少病謀向物違幽幽草根蟲生意與我微

竹風相戛語幽閨暗中聞鬼神滿哀聽恍惚難自分商
葉隨乾雨秋衣卧單雲病骨可剗物酸呻亦成文瘦攢
如此枯壯落隨西曛裊裊一絲命徒言繫網緼

老骨懼秋月秋月刀劒稜纖威不可干冷魄坐自凝羈
雌巢空鏡仙颺蕩浮冰驚步恐自翻病大不敢凌單牀
寤皎皎瘦卧心兢兢洗河不見水透濁為清澄詩壯昔

空說詩哀今何憑

老病多思慮朝夕非一心
商蟲哭哀運繁響不可尋
秋草瘦如髮貞芳綴疎金
晚鮮詎幾時馳景還易陰
弱習徒自耻暮知欲何任
露才一見讒潛智早已深
防深不防露此意古所箴

冷露多瘁索枯風饒吹噓
秋深月清苦蟲老聲粗疎
頽珠枝累累芳金蔓舒舒
草木亦趣時寒榮似春餘
自悲零落生與我心何如

老人朝夕異生死每日中坐隨一啜安卧與萬景空視
短不到門聽澀詎逐風還如刻削形免有纖悉睠浪浪
謝初始皎皎幸歸終四時既相迫萬慮自然叢曩懷沈
遙江衰思結秋蒿鋤食難滿腹葉衣多醜躬塵纓不自
整苦吟將誰通

詈言不見血殺人何紛紛聲如窮家犬吠竇何閭閻詈
痛幽鬼哭詈侵黃金貧言詞豈用多憔悴在一間古詈
古不死至今書云云今人詠古書善惡宜自分秦火不

藝古秦火空藝文所以詈更生至今橫網緼

與韓愈李翱張籍話別

朱絃奏離別華燈少光輝物色豈知異人心顧將違客
程殊未已歲華忽然微秋桐故葉下寒露新雁飛遠遊
起重恨送人念先歸夜集類羈鳥晨光失相依馬跡遶
川冰雁書還閨闈常恐親朋阻獨行知慮非

病起言懷

強行尋溪水洗却殘病姿花景晚晚盡麥風清冷吹交

道卧來見世情貧去知高閒思楚逸淺薄厭齊兒終伴
碧山侶結言青桂枝

西上經靈寶觀

觀即尹真人舊宅

道士無白髮語音靈泉清青松多壽色白石恒夜明放
步霽霞起振衣華風生真文祕中頂寶氣浮四楹一片
古關路萬里今人行上仙不可見驅策徒西征

靖安寄居

寄靜不寄譁愛茲嵒岨居渴飲濁水泉飢食無名蔬敗

葉不查火補衣亦寫書古云儉成德今乃實起余慙叟
慙不足賢人賢有餘役生皆促促心境誰舒舒萬馬踏
風衢衆塵隨奔車高賓盡不見大道夜方虛卧有洞庭
夢坐無長安儲英髦空駁耳煙火獨微如厚念恐傷性
薄田竟親鋤承世不出力冬竹肯抽蘗外物莫相誘約
心誓從初碧芳既似水日日詠歸歟

遊終南龍池寺

飛鳥不到處僧房終南巔龍在水長碧雨開山更鮮步

出白石上坐依清溪邊地寒松桂短石險道路偏晚磬
送歸客數聲落遙天

山老吟

不行山下地惟種山上田腰斧斫旅松手瓢汲家泉詎
知文字力莫記日月遷蟠木為我身始得全天年

遊子吟

慈母手中線遊子身上衣臨行密密縫意恐遲遲歸誰
言寸草心報得三春暉

折楊柳

楊柳多短枝短枝多別離贈遠累攀折柔條安得垂青
春定有節離別無定時但恐人別促不怨來遲遲莫言
短枝條中有長相思朱顏與綠楊併在別離期

旅次洛陽東水亭

水竹色相洗碧花動軒楹自然逍遙風蕩滌浮競情霜
落葉聲燥景寒人語清我來招隱亭衣上塵暫輕

出東門

餓馬骨亦聳獨驅出東門少年一日程衰叟十日奔寒
景不為我疾走落平原眇然荒草行恐懼夜魄翻一生
自組織千首大雅言道路如抽蠶宛轉羈腸繁

長安羈旅

聽樂別離中聲聲入幽腸曉淚滴楚瑟夜魄遶吳鄉幾
迴羈旅情夢覺殘燭光

初于洛中選

塵土日易沒驅馳力無餘青雲不我與白首方選書宦

途事非遠拙者取自踈終然戀皇邑誓以結吾廬帝城
富高門京路饒勝居碧水走龍狀蜿蜒遶庭除尋常異
方客過此亦踟躕

春愁

春物與愁客遇時各有違故花辭新枝新淚落故衣日
暮兩寂寞飄然亦同歸

春集越州皇甫秀才山亭

嘉友在何處置亭春山巔顧余寂寞者謬廁芳菲筵視

聽日澄澈聲光坐連縣晴湖瀉峰嶂翠浪多萍蘚何以
遲高志為君吟秋天

汝州陸中丞席喜張從事至同賦

汝水無濁波汝山饒奇石大賢為此郡佳士來如積有
客乘白駒奉義愜所適清風蕩華館雅瑟泛瑤席芳醕
靜無喧金樽光有滌縱情孰慮損聽論自招益願折若
木枝却彼曜靈夕貴賤一相接憂悰忽轉易會合勿言
輕別離古來惜請君駐征車良遇難再覲

蘇州崑山惠聚寺僧房

昨日到上方
片雲挂石牀
錫杖莓苔青
袈裟松柏香
晴磬無短韻
古燈含永光
有時乞鶴歸
還訪逍遙場

吳安西館贈從弟楚客

蒙龍楊柳館
中有南風生
風生今為誰
湘客多遠情
孤枕楚水夢
獨帆楚江程
覺來殘恨深
尚與歸路并
玉匣五絃在
請君時一鳴

桐廬山中贈李明府

靜境無濁氛清雨零碧雲千山不隱響一葉動亦聞即
此佳志士精微誰相羣欲識楚章句袖中蘭茝薰

贈韓郎中愈

何以定交契贈君高山石何以保貞堅贈君青松色貧
居過此外無可相彩飾聞君碩鼠詩吟之淚空滴

憶周秀才素上人時聞各在一方

東西分我情魂夢豈能定野客雲作心高僧月為性浮
雲自高閒明月常空淨衣敝得古風居山無俗病吟聽

碧雲語手把青松柄羨爾欲寄書飛禽杳難倩

春夜憶蕭子真

半夜不成寐燈盡又無月獨向階前坐子規啼不歇况
我有金蘭忽爾為胡越爭得明鏡中久長無白髮

送諫議十六叔至孝義渡後奉寄

曉渡明鏡中霞衣相飄颻浪鳧驚亦雙蓬客將誰僚別
飲孤易醒離憂壯難銷文清雖無敵儒貴不敢驕江吏
捧紫泥海旗剪紅蕉分明太守禮跨躡毗陵橋伊洛去

未迴遐矚空寂寥

答韓愈李觀別因獻張徐州

富別愁在顏貧別怨銷骨懶磨舊銅鏡畏見新白髮古
樹春無花子規啼有血離絃不堪聽一聽四五絕世途
非一險俗慮有千結何客步大方驅車獨迷轍故人韓
與李逸翰雙皎潔哀我摧折歸贈詞縱橫設徐方國東
樞元戎天下傑襴生投刺遊王粲吟詩謁高情無遺照
朗抱開曉月欲識丈夫心曾將孤劍說

汝墳蒙從弟楚材見贈時郊將入秦楚材適楚
朝為主人心夕作行客吟汝水忽淒咽汝風流苦音北
闕秦門高南山楚石深分淚灑白日離腸繞青岑何以
寄遠懷黃鶴能相尋

送從弟郢東歸

爾去東南夜我無西北夢誰言貧別易貧別愁更重曉
色奪明月征人逐羣動秋風楚濤廣旅榜將誰共

送清遠上人歸楚山舊寺

波中出吳境霞際登楚岑山寺一別來雲蘿三改陰詩
誇碧雲句道證青蓮心應笑泛萍者不知松隱深

贈姚怱別

美人廢琴瑟不是無巧彈聞君郢中唱始覺知音難驚
蓬無還根馳水多分瀾倦客厭出門疲馬思解鞍何以
寫此心贈君握中丹

感懷二首

秋氣悲萬物驚風振長道登高有所思寒雨傷百草平

生有親愛零落不相保五情今已傷安得能自老
火雲流素月三五何明明光曜侵白日賢愚迷至精四
時更變化天道有虧盈常恐今已沒須臾還復生

湘靈祠

南巡竟不返二妃怨逾積萬里喪蛾眉瀟湘水空碧冥
冥荒山下古廟收貞魄喬木深青春清光滿瑤席塞芳
徒有薦靈意殊脉脉玉佩不可親徘徊煙波夕

湖州取餅述情

雲水徒清深，照影不照心。
白鶴未輕舉，衆鳥爭浮沈。
因茲挂帆去，遂作歸山吟。

老退

退身何所食，敗力不能閒。
種稻耕白水，負薪斫青山。
衆聽喜已唱，獨醒愁楚顏。
日暮靜歸時，幽幽扣松關。

獨怨

前日遠別離，昨日生白髮。
欲知萬里情，曉卧半牀月。
常恐百蟲鳴，使我芳草歇。

過分水嶺

山壯馬力短路行石齒中十步九舉轡迴環失西東溪
水變為雨懸厓陰濛濛客衣飄飄秋葛花零落風白日
捨我沒征途忽然窮

出門行

海風蕭蕭天雨霜窮愁獨坐夜何長驅車舊憶太行險
始知遊子悲故鄉美人相思隔天闕長望雲端不可越
手持琅玕欲有贈愛而不見心斷絕南山我我白石爛

碧海之波浩漫漫參辰出沒不相待我欲橫天無羽翰

夷門雪贈主人

夷門貧士空吟雪夷門豪士皆飲酒酒聲歡鬧入雪銷
雪聲激切悲枯朽悲歡不同歸去來萬里春風動江柳

傷春

兩河春草海水清十年征戰城郭腥亂兵殺兒將女去
二月三月花冥冥十里無人旋風起鶯啼燕語荒城裏
春色不揀墓傍枝紅顏皓色逐春去春來邙得知

今人看花古人墓令人惆悵山頭路

望夫石

望夫石夫不來兮江水碧行人悠悠朝與暮千年萬年
色如故

舟行書事寄杭州崔員外

張頤任口澆開眼信花燒舊國歸何滯新知別又遙夜
行篙觸石晚泊纜依橋若未重相見無門解寂寥

寄元緒上人

石窓紫蘚牆此世比清涼
研露題詩潔消冰煮茗香閒
雲春影薄孤磬夜聲長
何計休為吏從師老上方

折楊柳

樓上春風過風前楊柳歌
枝疎緣別苦曲怨為年多
花驚燕地雪葉映楚池波
誰堪別離此征戍在交河

送從舅端適楚地

歸情似泛空飄蕩楚波中
羽扇埽輕汗布帆篩細風
江花折菡萏岼影泊梧桐
元舅唱離別賤生愁不窮

送殷秀才南還

詩句滿離袂
酒花薰別顏
水程千里外
岸泊幾宵間
風葉亂辭木
雪猿清叫山
南中多古事
詠遍始應還

終南山下作

見此原野秀
始知造化偏
山村不假陰
流水自雨田
家梯碧峰
門門鎖青煙
因思蛻骨人
化作飛桂仙

秋夕貧居述懷

卧冷無遠夢
聽秋酸別情
高枝低枝風
千葉萬葉聲
淺

井不共飲瘦田長廢耕今交非古交貧語聞皆輕

喜與長文上人宿李秀才小山池亭

燈盡語不盡主人庭砌幽柳枝星影曙蘭葉露華浮塊
嶺笑羣岫片池輕衆流更聞清淨子逸唱頗難酬

寄華州李中丞

毛女峰前郡煙霞氣轉清庭分靈掌影牕度瀑泉聲蘚
逕人稀到松齋藥自生常餐亦芝朮閒坐是公卿看水
逢仙鶴登樓見帝城養生非酒病難隱是詩名省署常

連步江皋只獨耕偶題無六義聊以達微誠

送柳淳

青山臨黃河下有長安道世上名利人相逢不知老

歸信吟

淚墨灑為書將寄萬里親書去魂亦去兀然空一身

古怨

試妾與君淚兩處滴池水看取芙蓉花今年為誰死

閨怨

妾恨比斑竹下盤煩冤根有筍未出土中已含淚痕

古意

河邊織女星河畔牽牛郎未得渡清淺相對遙相望

樂府戲贈陸大夫十二丈二首

蓮子不可得荷花生水中猶勝道傍柳無事蕩春風
蓮葉未開時苦心終日卷春水徒蕩漾荷花未開展

再下第

一夕九起嗟夢短不到家兩度長安陌空將淚見花

古別離

欲別牽郎衣郎今到何處不恨歸來遲莫向臨邛去

洛橋晚望

天津橋下水初結洛陽陌上人行絕榆柳蕭疎樓閣閒
月明直見嵩山雪

歐陽詹

字行周
晉江人

自懷州却赴洛途中作

惆悵策疲馬孤蓬被風吹昨東今又西冉冉長路岐歲

晚樹無葉夜寒霜滿枝
依人恒辛苦冥漠天不知

春日途中寄所親

客路越年行故園未云返
悠悠去源水日日祇應遠
始歎秋葉零又看青草晚
寄書南飛鴻相憶劇鄉串

初發太原途中寄太原所思

驅馬覺漸遠回頭長路塵
高城已不見況復城中人去
意自未甘居情諒猶辛
五原東北晉千里西南秦
一屢不出門一車無停輪
流萍與繫匏早晚期相親

銅雀妓

蕭條登古臺回首黃金屋
落葉不歸林高陵永為谷
妝容徒自麗舞態閱誰目
嗚咽慙帷前歌聲苦于哭

同諸公過福先寺律院宣上人房

律座下朝講畫門猶掩關
叨同靜者來正值高雲閒
寂爾方丈內瑩然虛白間
千燈智慧心片玉清羸顏
松色落深井竹陰寒小山
晤言流曦晚惆悵歸人寰

孟冬蒲津關河亭作

息駕非窮途未濟豈迷津獨立大河上北風來吹人雪
霜自茲始草木當更新嚴冬不肅殺何以見陽春

奉勅祭南嶽

皇家禮赤帝謬獲司風域致齋紫蓋下宿設祝融側鳴
澗驚宵寐清猿逋時刻凜潔事成興簪佩思盡飾危壇
象岳趾秘殿翹翬翼登拜不遑顧酌獻皆累息贊道儀
匪繁祝史詞甚直忽覺心魂悸如有精靈逼漠漠雲氣
生森森杉栢黑風吹虛簫韻露洗寒玉色寂寞有至公

馨香在明德禮成謝邑吏駕言歸郡職憇桑訪蠶事遵
疇課農力所願風雨時迴首瞻南極

汝州行

汝潰春女蠶忙月朝起來桑日西沒輕綃袞露紅羅襪
半踏金梯倚枝歇空垂玉腕力不勝映葉朱唇似花發
相歡誰是冶遊郎蠶休不得岐路傍

道州春遊歐陽家林亭

道州城北歐陽家去郭一里占煙霞主人雖朴甚有思

鮮留滿地紅桃花
桃花成泥不須埽
明朝更訪桃源老
政成興足須告歸
門前便是家山道

上官昭容書樓歌

漢家婕妤唐昭容
工詩能賦千載同
自言才藝是天真
不服丈夫勝婦人
歌闌舞罷閒無事
縱恣優游弄文字
玉樓寶架中天居
絨寄秘異萬卷餘
水精編帙綠鈿軸
雲母搗紙黃金書
風飄花露清旭時
綺窓高掛紅綃帷
香囊盛煙繡結絡
翠羽拂案青瑠璃
吟披嘯卷終無已

皎皎淵機破研理詞縈彩翰紫鸞迴思耿寥天碧雲起
碧雲起心悠哉境深轉苦坐自催金梯珠履聲一斷瑤
階日夜生青苔青苔秘丹闕曾比羣玉山神仙杳何許
遺跡滿人間君不見洛陽南市賣書肆有人買得研神
記紙上香多蠹不成昭容題處猶分明令人惆悵難為
情

早秋登慈恩寺塔

寶塔過千仞登臨盡四維毫端分馬頰墨點辨蛾眉地

迴風彌緊天長日久遲因高欲有賦遠意復誰知

荆南夏夜水樓懷昭丘直上人雲夢李莘

無機成旅逸中夜上江樓雲靜月如練水涼風似秋
鳬聲聞夢澤黛色上昭丘不遠人情在良宵恨獨遊

旅次舟中對月寄姜公

中宵天色淨片月出滄洲皎潔臨孤島嬋娟入亂流
應同故園夜獨起異鄉愁那得休蓬轉從君上庾樓

送文暢上人東遊

隨緣聊振錫高步出東城水止無根地雲行不計程到
時為彼岸過處即前生今日臨歧別吾徒自有情

衡州送李十一兵曹赴浙東

慷慨視別劍淒涼泛離琴前程楚塞斷此恨洞庭深文
字久已廢循良非所任期君碧雲上千里一揚音

春日遊郭駙馬大安亭子

戚里容閒客山泉若化城寄遊芳徑好借賞彩舟輕春
至花常滿年多水更清此中如傳舍但自立功名

衡州歲前合江亭見櫻藥未坼因賦

山櫻先春發紅蘼滿霜枝幽處竟誰見芳心空自知似
分朝日照疑畏暖風吹欲問含彩意恐驚輕薄兒

道中秋夜南樓即事

誰念獨坐愁日暮此南樓雲去舜祠閉月明瀟水流猿
聲何處曉楓葉滿山秋不分匣中鏡少年看白頭

經河源軍漢村作

行行忽到舊河源城外千家作漢村樵採未侵征虜墓

耕耘還就破羌屯金湯天險長全設伏臘華風亦暗存
暫駐單車空下淚用心無力復何言

和嚴長官秋日登太原龍興寺閣野望

百丈化城樓君登最上頭九霄迴棧路八到視并州煙
火遺堯庶山河啓聖猷短垣齊介嶺片帛指汾流清鐸
中天籟哀鴻下界秋境閒知道勝心遠見名浮豈念乘
肥馬方應駕大牛自憐蓬逐吹不得與良遊

道州途中即事

零桂佳山水榮陽舊自同經途看不暇遇境說難窮疊
嶂青時合澄湘漫處空舟移明鏡裏路入畫屏中巖壑
千家接松蘿一徑通漁煙生縹渺犬吠隔籠蔥戲馬留
餘翠幽花怯晚紅光翻沙瀨日香散橘園風信美非吾
土分憂屬賤躬守愚資地僻卹隱望年豐且保心能靜
那求政必工課終知免戾歸養洛城東

奉送范司空赴朔方

築壇登上將滕席委前籌虜滅南侵跡朝分北顧憂抗

旌迴廣莫撫劒動旄頭坐見黃雲暮行看白草秋山行
舊秦塞河繞古靈州善守知兵事惟應獵騎遊

鞏路感懷

馬嘶白石暮劒鳴秋氣來我心浩無際河上空徘徊

衡州早春二首

碧水何逶迤東風吹沙草煙波千萬曲不辨嵩陽道
病肺不飲酒傷心不看花惟驚望鄉處猶自隔長沙

石臼嶺寄嚴僕射

鳥企蛇盤地半天下窺千仞到浮煙因高迴望沾恩處
認得梁州落日邊

題延平劍潭

想象靈光欲見難通津一去水漫漫空餘昔日凌霜色
長與澄潭白晝寒

迴別業留別郭中諸公

千山江上背斜暉一徑中峰見所歸不信扁舟回在晚
宿雲先已到柴扉

看渾中丞山桃花初有他客不通晚方得入因
有戲贈

朝來駐馬香街裏風度遙聞語笑聲無事閉門教日晚
山桃落盡不勝情

戲贈靈澈上人

僧家亦有芳春興自是心源無滯境君看池水湛然時
何曾不受花枝影

冬夜即事

百憂攢心起復卧夜長耿耿不可過風吹雪枝似花落
月照冰文如鏡破

道州郡齋卧病寄東館諸賢

東池送客醉年華聞道風流勝習家獨卧郡齋寥落意
隔簾微雨濕梨花

讀小弟詩有感因以口號示之

憶君未冠賞年華二十年間在咄嗟今來羨汝看花歲
似汝追思昨日花

呂溫

字叔和
河中人

吐蕃別館和周十一郎中楊七錄事望白水山
作

純精結竒狀皎皎天一涯
玉嶂擁清氣蓬風開白花
半巖晦雲雪高頂澄煙霞
朝昏對賓館隱映如仙家
夙聞蘊孤尚終欲窮幽遐
暫因役餘暇偶得志所嘉
明時無外戶勝境即中華
況今舅甥國誰道隔流沙

同舍弟歲暮寄晉州李六協律



古人猶悲秋况復歲暮時急景迫流念窮陰結長悲陽
鳥下西嶺寒鵲驚南枝攬衣步霜砌倚杖臨水池怳怳
若有失悄悄良獨悲忽聞晨起吟宛是同所思曲水杏
花雪香街青柳絲良時且暫歡樽酒聊共持閒過漆園
叟醉看五陵兒寄言思隱處不久來相追

贈友人

南山雙橋松擢本皆千尋夕流膏露津朝被青雲陰負
雪出深澗搖風倚高岑明堂久不構雲幹何森森匠意

方雕巧時情正夸淫生材會有用天地豈無心

古興

越歐百鍊時楚下三泣地希寶無人識千齡皆棄置空
巖起白虹古獄生紫氣安得命世客直來開奧秘劍任
拂鐘看玉從投火試必能絕疑惑然後論奇異

詠風

微風生青蘋習習出金塘輕搖深林翠靜獵幽徑芳掩
抑時未來鴻毛亦無傷一朝乘嚴氣萬里號清霜北走

卷五十八
摧鄧林東去落扶桑埽却垂天雲澄清無私光悠然返
空寂晏海通舟航

冬日病中即事

墻下長安道囂塵咫尺間久牽身外役暫得病中閒背
喜朝陽滿心憐暮鳥還吾醫在何處南有白雲山

白雲起封中詩

封開白雲起漢帝坐齋宮望在泥金上疑生秘玉中攢
柯初繚繞布葉漸蒙籠日觀祥光合天門瑞氣通無心

以出岫有勢欲凌風儻遣成膏澤從茲徧大空

終南精舍月中聞磬聲詩

月峰禪室掩幽磬靜昏氛思入空門妙聲從覺路聞冷
泠滿虛壑杳杳出寒雲天籟疑難辨霜鐘詎可分偶來
遊法界便欲謝人羣竟夕聽真響塵心自解紛

道中夏郡內北橋新亭書懷贈何元二處士

結構池梁上登臨日幾回晴空交密葉陰岸積蒼苔爽
氣中央滿清風四面來振衣生羽翰高枕出塵埃齊物

魚何樂忘機鳥不猜閒銷炎晝盡靜勝火雲開僻遠宜
孱性優游賴廢材願為長泛梗莫作重燃灰守道窮非
過先時動是災寄言徐孺子賓榻且徘徊

道州敬訓何處士懷郡樓月夜之作

清質悠悠素彩融長山迴陸合為空佳人甚近山城閉
夏夜相望山鏡中

二月一日是貞元舊節有感絕句寄黔南賓三

洛陽盧七

同事先皇立玉墀中和舊節又支離
今朝各自看花處
萬里遙知掩淚時

衡州早春偶遊黃溪口號

偶尋黃溪日欲沒
早梅未盡山櫻發
無事江城閉此身
不得坐待花間月

衡州夜後把火看花留客

紅芳暖落碧池頭
把火遙看更少留
半夜忽然風更起
明朝不復上南樓



石倉歷代詩選卷五十八